



Pwyllgor yr Economi, Masnach a Materion Gwledig

SeneddEconomi@senedd.cymru

07 Mawrth 2024

Annwyl Gyfaill

Ymgynghoriad: ymchwiliad i'r economi werdd

Diolch yn fawr am y cyfle i gymryd rhan yn yr ymgynghoriad uchod. Rydyn ni'n credu bod potensial gwirioneddol gan y sector sero net i gyfrannu at ffyniant economaidd ardaloedd sydd â dwysedd uchel o siaradwyr Cymraeg, a thrwy hynny gyfrannu at gynnal a chefnogi'r Gymraeg fel iaith gymunedol a chefnogi strategaeth iaith y Llywodraeth, [Cymraeg 2050](#). Mae ein hymateb yn canolbwyntio ar yr hyn rydyn ni'n ystyried ddylai fod yn flaenoriaethau i'r Llywodraeth er mwyn sicrhau bod hyn yn digwydd.

Mae ein hymateb yn canolbwyntio ar y materion canlynol:

- Y berthynas rhwng y strategaeth sero net a pholisïau Llywodraeth Cymru ynghylch cefnogi economi cymunedau Cymraeg eu hiaith
- Y berthynas a'r potensial sy'n bodoli rhwng rhai sectorau sero net penodol a chymunedau Cymraeg eu hiaith. Mae sectorau fel amaethyddiaeth, defnydd tir a choedwigaeth, a chynhyrchu trydan a gwres yn cynnig cyfleoedd economaidd amlwg i ardaloedd lle mae dwysedd uchel o siaradwyr Cymraeg.
- Pwysigrwydd cynllunio addysg a llwybrau hyfforddiant iaith Gymraeg lleol yn y sectorau penodol hyn. O gynllunio'n bwrpasol mae cyfle i ddatblygu sgiliau'r boblogaeth i gynnig swyddi o ansawdd da, i annog pobl ifanc i aros yn eu hardaloedd, ac i ddiwallu anghenion economaidd y dyfodol yn yr ardaloedd hyn.

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



- Cyfraniad y sector sgiliau sero net at y strategaeth genedlaethol ar gyfer cynyddu defnydd y Gymraeg mewn gweithleoedd ac wrth ddarparu gwasanaethau.
- Ffyrdd o rymuso cymunedau i gymryd mantais o gyfleoedd economaidd yr economi werdd.

Yr economi werdd, Cymraeg 2050 a chryfhau cymunedau Cymraeg

Mae cefnogi seilwaith economaidd-gymdeithasol cymunedau Cymraeg yn un o amcanion craidd strategaeth iaith Gymraeg Llywodraeth Cymru. Mae strategaeth [Cymraeg 2050](#) yn pwysleisio pwysigrwydd datblygu economi ffyniannus, gynaliadwy er mwyn cynnal a chryfhau'r cymunedau hynny lle mae dwysedd uchel o siaradwyr Cymraeg. Yr her yw sicrhau fod gan bobl swyddi o ansawdd da, gyrfaoedd deniadol a chartrefi er mwyn iddynt allu aros, neu ddychwelyd, i'r cymunedau hynny. Mae'r sectorau'r economi werdd, fel economi fydd yn gynyddol allweddol yn y dyfodol, yn hynod arwyddocaol yn y cyd-destun hwn.

Fel rhan o'i strategaeth ar gyfer cefnogi cymunedau Cymraeg, mae Llywodraeth Cymru wedi sefydlu Comisiwn ar Gymunedau Cymraeg, fydd yn gyfrifol am ystyried ffyrdd o gryfhau sefyllfa'r Gymraeg fel iaith gymunedol. Yn ei [bapur safbwynt](#) cychwynnol a gyhoeddwyd ym mis Mehefin 2023, mae'r Comisiwn yn gwneud y cysylltiad rhwng yr angen i gefnogi ffyniant economaidd cymunedau Cymraeg, a'r cyfleoedd cyffrous sy'n bodoli yn sgil datblygiadau economaidd sero net. Mae papur safbwynt y Comisiwn yn gweld potensial i economi ardaloedd gorllewinol Cymru ymgryfhau yn sgil '*cyfleodd economaidd trawsnewidiad gwyrdd*', yn enwedig gan '*ei bod yn meddu ar lawer o adnoddau naturiol perthnasol*'.

Mae gorgyffwrdd amlwg yma rhwng rhai o amcanion creiddiol strategaeth iaith Gymraeg Llywodraeth Cymru, a'r strategaeth sy'n bodoli ar gyfer cyflawni ymrwymadau sero net. Dylai ystyried y cysylltiadau hyn ac egluro rôl allweddol y sector sgiliau yng Nghymru yn y cyd-destun hwn fod yn flaenoriaeth i'r Llywodraeth. Rydym hefyd yn awyddus i weld

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



anghenion sgiliau o fewn cymunedau Cymraeg wedi eu hadlewyrchu o fewn y mapiau ffyrdd ar gyfer sgiliau yn y sector sero net mae'r Llywodraeth yn eu paratoi'n bresennol a thrwy'r Cynllun Ffermio Cynaliadwy. Dylai'r Llywodraeth fuddsoddi mewn datblygu'r economi werdd mewn ardaloedd gwledig ac ôl-ddiwydiannol lle mae dwysedd uchel o siaradwyr Cymraeg, er budd agenda'r economi werdd a'r Gymraeg. Mae angen gwella'r sail dystiolaeth er mwyn cynllunio'n well ac er mwyn helpu pobl leol i fanteisio ar y swyddi all ddeillio o drawsnewidiad yr economi werdd. Mae canolbwyntio ar integreiddio agenda'u polisi cysylltiedig (er enghraifft, y Gymraeg, yr economi werdd, ac amaethyddiaeth) yn un ffordd o wneud y mwyaf o fuddsoddiad ac o gael y buddion fwyaf posib yng nghyd-destun cyfyngiadau cyllidebol sylweddol.

Anghenion sgiliau sectorau'r economi werdd a dyfodol cymunedau Cymraeg

Mae amryw o'r sectorau sero net yn berthnasol iawn yng nghyd-destun dyfodol cymunedau Cymraeg. Hynny yw, mae llawer o'r ardaloedd lle mae dwysedd uchel o siaradwyr Cymraeg hefyd yn ardaloedd lle mae potensial i ddatblygiadau economaidd sero net. Mae hwn felly yn un maes y dylai'r Llywodraeth fod yn ei flaenoriaethu er mwyn gwneud y mwyaf o'r cyfleoedd economaidd ac ieithyddol/cymunedol sy'n bodoli drwy sectorau'r economi werdd. Mae hefyd ystyriaethau penodol o ran anghenion sgiliau yn yr ardaloedd hyn, sydd felly yn gofyn i'r Llywodraeth weithio mewn partneriaeth â nifer o sefydliadau er enghraifft, darparwyr addysg, y Comisiwn Addysg Drydyddol a'r Coleg Cymraeg Cenedlaethol.

Amaeth, defnydd tir a choedwigaeth

Dangosodd y Cyfrifiad Cenedlaethol fod 43% o weithwyr amaethyddol (gan gynnwys pysgota a choedwigaeth) yn siarad Cymraeg, o gymharu â 17.8% o'r boblogaeth yn gyffredinol. Amaethyddiaeth yw'r sector cyflogaeth â'r gyfran uchaf o siaradwyr Cymraeg, a dylai ei chefnogi i ffynnu fod yn flaenoriaeth er mwyn sicrhau bod y Gymraeg yn hyfyw yn ein cymunedau gwledig. Mae'r egwyddor hon wedi ei gynnwys ym mhedwerydd amcan rheoli tir yn gynaliadwy Deddf Amaethyddiaeth (Cymru) 2023, sydd yn ei gwneud yn

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



ofynnol i “*gadw a gwella cefn gwlad ac adnoddau diwylliannol a hyrwyddo mynediad y cyhoedd iddynt a’u hymgysylltiad â hwy, a chynnal y Gymraeg a hyrwyddo a hwyluso ei defnydd.*”

Bydd gweithio tuag at gyflawni ymrwymadau sero net yn cael dylanwad sylweddol ar y sector amaeth yng Nghymru, ac felly o reidrwydd ar gymunedau lle mae’r Gymraeg ar ei chryfaf. Mae adroddiad Canolfan Polisi Cyhoeddus Cymru [Sgiliau sero net: Mewnwelediadau a thystiolaeth o sectorau allyriadau yng Nghymru](#) (2020: 6) yn adrodd bod ‘*NFU Cymru yn disgrifio ffermio yng Nghymru fel ‘cadarnle i’r iaith Gymraeg. Mae angen trin yr iaith yn ofalus felly wrth i strwythur y farchnad lafur newid. Mae prynu tir fferm ar gyfer dal a storio carbon, er enghraifft, yn newid defnydd y tir ac yn ei dro yn peryglu cydbwysedd ieithyddol ardaloedd.*’ Mae’r adroddiad yn argymhell bod y Llywodraeth a chyfranogwyr eraill yn y system addysg a sgiliau yn ystyried yr angen am ddarpariaeth leol o gyrsiau a chymwysterau cyfrwng Cymraeg, er mwyn sicrhau bod gweithwyr a defnyddwyr Cymraeg eu hiaith yn cael eu cefnogi drwy gydol y cyfnod pontio. Mae’r asesiad yma yn wir ar gyfer y sector amaeth, yn ogystal â’r sectorau defnydd tir, newid tir a choedwigaeth.

Mae yna felly nifer o ystyriaethau penodol y dylai’r Llywodraeth eu hystyried yng nghydestun y sector amaeth, defnydd tir a choedwigaeth. Mae angen cydnabod arwyddocâd newidiadau yn y sectorau hyn i ddyfodol cymunedau Cymraeg eu hiaith. Bydd dyfodol y cymunedau arwyddocaol hyn yn dibynnu ar gefnogi’r sector i addasu a newid, a bydd darparu hyfforddiant a sgiliau drwy gyfrwng y Gymraeg yn rhan hanfodol o hyn. Mae angen i’r Llywodraeth ystyried sut bydd datblygu ac uwchsgilio’r gweithlu presennol nid yn unig yn cefnogi agenda sero net, ond hefyd amcanion y Cynllun Ffermio Cynaliadwy, ac amcanion strategaeth iaith Gymraeg y Llywodraeth.

Sector cynhyrchu trydan a gwres

Roedd ymgynghoriad diweddar y Llywodraeth am sgiliau yn y sector sero net yn cyfeirio at ranbarthau o’r DU sy’n briodol ar gyfer cynhyrchu pŵer carbon isel, gyda ffocws posib ar

Comisiynydd y Gymraeg
Siambrau'r Farchnad
5–7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5–7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



feysydd sy'n flaenoriaethau ar gyfer mynd i'r afael ag anghydraddoldebau economaidd-gymdeithasol. Rydyn ni'n credu bod llawer o'r cymunedau gwledig ac ôl-ddiwydiannol sydd â dwysedd uchel o siaradwyr Cymraeg yn berthnasol yn y cyd-destun hwn. Mae strategaeth *Cymraeg 2050* hefyd yn cyfeirio at rai o'r ardaloedd yma fel rhai sydd â phocedi o amddifadedd a thlodi gwledig, a chyflogau cyfartalog sydd ymhlith yr isaf yn y Deyrnas Unedig. Mae'n amlwg i ni felly bod angen ystyried ymhellach potensial datblygiadau yn y sector cynhyrchu trydan a gwres yn yr ardaloedd hynny sydd â dwysedd uchel o siaradwyr Cymraeg, sydd ag adnoddau naturiol perthnasol, ac a fyddai hefyd yn elwa'n sylweddol o fuddsoddiad economaidd-gymdeithasol o'r fath.

Llwybrau addysg a hyfforddiant iaith Gymraeg lleol

Fel sydd wedi ei nodi eisoes, er mwyn manteisio ar y potensial sy'n bodoli i gefnogi ffyniant economaidd cymunedau Cymraeg drwy ddatblygiadau sero net, mae'n hanfodol bod llwybrau addysg a hyfforddiant addas ar gael yn lleol, a thrwy gyfrwng y Gymraeg. Er enghraifft, os oes gan ardal y potensial ar gyfer datblygiad ynni gwynt, yna mae angen sicrhau bod yna lwybrau hyfforddi i bobl leol fedru manteisio ar hyn, a hynny drwy gyfrwng y Gymraeg. Yn ogystal, dylai cyrsiau hyfforddi ar gyfer diwydiannau penodol gael eu darparu mor agos â phosib at yr ardal honno, er mwyn hwyluso pobl i aros a byw yn eu cymunedau.

Er nad oes gennym ddarlun llawn o'r bylchau sy'n bodoli yn y ddarpariaeth yng Nghymru, fe wyddom fod nifer sylweddol o fyfyrwyr o Gymru yn mynd i astudio i brifysgolion yn Lloegr. Mae'n debyg bod nifer o resymau dros hyn, ac mae'n bosib bod diffyg darpariaeth ddigonol yn rhan o'r rheswm. Mae cyfraddau'r bobl ifanc sy'n gadael Cymru i fynd i'r brifysgol yn dipyn uwch na'r gwledydd eraill ym Mhrydain. Nid oes tystiolaeth ar gael am niferoedd y myfyrwyr sy'n dychwelyd i Gymru ar ôl graddio, ond mae'n debygol nad yw nifer o'r myfyrwyr yma yn dychwelyd. Rydyn ni'n gweld hyn fel problem o ran diwallu anghenion Cymru, ac mae'n tanseilio bwriad y Llywodraeth o gynllunio ar gyfer anghenion Cymru. Dylai'r Llywodraeth ystyried sut y gallai chwarae rhan yn yr ymdrech i ddellio â'r

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



fffenomenon yma sy'n ddinistriol iawn, nid yn unig i'r Gymraeg, ond i ffyniant Cymru i'r dyfodol. Bydd hyn yn gofyn am gydweithio agos â phartneriaid o fewn y sector addysg a hyfforddiant.

Ychydig iawn o wybodaeth sydd gennym am anghenion sgiliau Cymraeg mewn sectorau gwahanol. Gan fod yr economi werdd am fod yn gynyddol bwysig, ac er mwyn gallu cynllunio a gweithredu'n strategol mae angen casglu data dibynadwy er mwyn gosod gwaelodlin o'r darlun cenedlaethol a lleol, ac yna osod targedau ar gyfer gwella. Yn hynny o beth, mae angen i Lywodraeth Cymru weithio gyda'r Partneriaethau Sgiliau Rhanbarthol, a rhanddeiliaid eraill perthnasol gan gynnwys Comisiynydd y Gymraeg, er mwyn datblygu sail tystiolaeth mwy cadarn am y sgiliau Cymraeg sy'n bodoli o fewn y gwahanol sectorau sero net, yn ogystal â faint o sefydliadau sy'n gweithredu trwy gyfrwng Gymraeg.

Gallai gwella'r sail ddata hefyd fod o gymorth wrth asesu effaith ceisiadau cynllunio ar gyfer datblygiadau mawr. Yn aml mae cynllunwyr gwlad a thref yn adrodd nad oes sail dystiolaeth ganddyn nhw i fedru gwneud asesiadau llawn a dwfn. Rydyn ni'n meddwl y dylai fod yn bosib creu asesiadau o'r sgiliau sydd ar gael mewn cymunedau, yn ogystal â gallu cymunedau i ddatblygu sgiliau, a bod hynny yn rhan o'r fethodoleg o asesu effaith tebygol datblygiadau ar y Gymraeg. Dylai datblygiadau mawr sy'n creu llawer o swyddi o fewn ardaloedd lle mae dwysedd uchel o siaradwyr Cymraeg fedru dangos pa mor debygol y bydd pobl leol o fedru manteisio ar y swyddi hynny. Mae cyfle, trwy'r mapiau ffyrdd ar gyfer sgiliau yn y sector sero net mae'r Llywodraeth yn eu paratoi ar hyn o bryd, i gynllunio tuag at fedru gwneud hynny yn y dyfodol.

Cynyddu defnydd y Gymraeg mewn gweithleoedd ac wrth ddarparu gwasanaethau

Mae Cymraeg 2050 yn sôn am y gweithle fel gofod allweddol ar gyfer cynyddu'r defnydd o'r Gymraeg. Esbonia bod y gweithle'n ganolog i'n bywydau bob dydd ac yn bwysig o ran datblygiad ieithyddol unigolion, gan ei fod yn gyfle i siaradwyr ar bob lefel ddefnyddio ac ymarfer yr iaith. Mae sicrhau bod addysg a hyfforddiant ar gyfer sgiliau sector sero net ar

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



gael drwy gyfrwng y Gymraeg yn hanfodol yn y cyd-destun cyffredinol hwn. Mae hwn yn un her amlwg i Lywodraeth Cymru a phartneriaid allweddol eraill.

Mae'r pwyntiau uchod yn arbennig o wir yng nghyd-destun sectorau sy'n ymwneud â'r cyhoedd, ac yn darparu gwasanaethau i'r cyhoedd. Mae'n bosib bod rhai sefydliadau hefyd dan safonau'r Gymraeg sy'n golygu bod dyletswydd arnynt i ddarparu gwasanaethau trwy gyfrwng y Gymraeg. Bydd galw cynyddol felly am weithluoedd sy'n medru gwasanaethu trwy gyfrwng y Gymraeg. Mae dros 120 o sefydliadau cyhoeddus yn gweithredu safonau'r Gymraeg, gan gynnwys cynghorau sir, parciau cenedlaethol, colegau addysg uwch, prifysgolion, Llywodraeth Cymru a Chyfoeth Naturiol Cymru, a dros amser bydd mwy o sefydliadau yn dod o dan y safonau. Yng nghyd-destun targed *Cymraeg 2050* i gynyddu'r nifer o siaradwyr i filiwn, rydym yn rhagweld y bydd galw am wasanaethau a gweithlu Cymraeg yn cynyddu o fewn sectorau sero net sydd tu hwnt i'r drefn safonau hefyd. Dylai'r mapiau ffyrdd sector sero net adlewyrchu effaith y galw cynyddol yma am sgiliau Cymraeg o fewn gweithluoedd presennol ac yn y dyfodol.

Grymuso cymunedau i gymryd mantais o gyfleoedd economaidd yr economi werdd

Roedd ymgynghoriad diweddar y Llywodraeth ar sgiliau'r sector sero net yn cyfeirio at wneud y mwyaf o berchnogaeth leol, gan gadw manteision economaidd a chymdeithasol yng Nghymru. Rydym yn cytuno bod modelau o berchnogaeth leol dros gynhyrchu egni yn ffordd effeithiol o greu swyddi da mewn ardaloedd Cymraeg. Mae ganddynt hefyd y potensial i gyfrannu at economi'r ardal leol. Rydym yn ymwybodol o sawl menter gymunedol yn y sector cynhyrchu trydan a gwres sy'n gweithredu trwy gyfrwng y Gymraeg, ac sy'n cyfrannu at yr economi leol. Yn ein sgysiau gyda Egni Cymunedol Cymru er enghraifft, mae Partneriaeth Ynni Ogwen ac Ynni Sir Gar yn ymddangos fel modelau esiampl arfer dda o sut i wneud y mwyaf o berchnogaeth leol a chefnogi'r Gymraeg yn rhagweithiol.

Mae llawer o ardaloedd arfordirol Gorllewin Cymru yn cynnwys cymunedau gyda'r dwysedd uchaf o siaradwyr Cymraeg, a gallai'r boblogaeth honno fanteisio ar

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales



ddatblygiadau yn y sector ynni morol. Rydym yn ymwybodol bod Menter Môn, sydd hefyd yn gweithredu yn y Gymraeg ac er budd y Gymraeg a chymunedau Môn, wedi datblygu prosiect ynni llif, Morlais. Dylai'r Llywodraeth fynd ati i ddysgu gan fentrau fel Ynni Ogwen, Ynni Sir Gar a Menter Môn er mwyn deall pa sgiliau oedd yn hanfodol i'w llwyddiant, a pha sgiliau y maen nhw'n rhagweld y byddant eu hangen yn y dyfodol. Mae Ynni Cymunedol Cymru wedi lansio gweithgor ar gydberchnogaeth, gan ddod â datblygwyr masnachol a grwpiau ynni cymunedol ynghyd i rannu gwybodaeth, mynd i'r afael â rhwystrau, a datblygu arferion gorau. Gallai ymgysylltu gyda'r gweithgor hwnnw fod yn ffordd effeithiol o ddysgu am anghenion sgiliau ar lefel leol, ac i feddwl sut y gallai'r Llywodraeth gefnogi cymunedau Cymraeg eraill i ail adrodd llwyddiannau'r grwpiau ynni cymunedol sy'n bodoli ac yn arloesi eisoes.

Rydym yn gobeithio y bydd y sylwadau uchod o ddefnydd i chi yn eich ymgynghoriad, ac rwy'n hapus i fy swyddogion gwrdd â chi i drafod ymhellach.

Yr eiddoch yn gywir,

Efa Gruffudd Jones

Comisiynydd y Gymraeg

Comisiynydd y Gymraeg
Siambrau'r Farchnad
5-7 Heol Eglwys Fair
Caerdydd CF10 1AT

0345 6033 221
post@comisiynyddygymraeg.cymru
Croesewir gohebiaeth yn y Gymraeg a'r Saesneg

comisiynyddygymraeg.cymru

Welsh Language Commissioner
Market Chambers
5-7 St Mary Street
Cardiff CF10 1AT

0345 6033 221
post@welshlanguagecommissioner.wales
Correspondence welcomed in Welsh and English

welshlanguagecommissioner.wales